

天鎮縣志卷之四

知縣張坊補輯

古蹟

八景附

勝地名區芳踪異蹟好事者每多咨賞獨至荒墟故壠
過其下者亦歛歔而不忍去豈非興廢存亡之感人人
有甚深耶黍離之歌峴山之淚其興懷一也志古蹟
廣牧故縣遼志本雲中縣地北魏道武帝置廣牧縣晉建
興四年爲箕澹後繼屯廣牧縣

天成故縣唐乾元元年廢蔚州橫野軍徙天成軍舍之又

改雲中郡復爲雲州遼析置天成縣隸雲州後升雲州
爲西京大同府金仍爲天成縣隸西京大同府元改天
成縣爲天城縣初隸宣德府後改隸興和路

玉泉驛舊志隋唐曰玉泉驛宋之北朝改爲玉泉縣元爲
興和路天城縣按宋之北朝當卽遼金但在遼則爲天
成縣隸雲州在金仍爲天成縣隸西京大同府玉泉縣
之說不知改自何時恐疑附會

榆林故縣舊志新平古爲榆林縣地屬集寧郡轄後爲蒙
古侵其疆明嘉靖十五年大同都督周尚文會題修邊

一道收入內地今遺址猶存

娘子城縣西南六十里城有三靳家居中隸縣境溫家在
西隸大同晉家在東半隸陽和半隸天城三姓世居之
郡志娘子城去白登二十里俗傳曲逆以美婦艷冒頓
激閼支過而信宿焉故名

增

龍泉寺在縣西五十里相傳東漢永明間建寺唐貞觀間
尉遲恭奉勅重修有手植古楊一株

增

盆山松在縣東十里盆山枝幹蒼老云是隋唐時物前縣

陳際熙胡元朗有詩

增

古戰場在城西七里墩

蕭后井在蕭牆堡相傳蕭后駐兵於此井水盈溢去則如故

假糧堆在城南十里許相傳蕭后用兵時以葦薦爲堆假充軍糈故名

馬市樓在新平堡北門外三里止有宣威二字石額明嘉靖時太監仇鸞請開馬市建楊忠愍公諫阻馬市此其一焉

應節井在縣南袁河底水清甘村人嗜焉每歲冬至日水

輒涸涓滴全無來年穀雨時水復出刻期不爽或被服
制人及孕婦冲之水則不出鄉人禱之仍出如常遂稱
應節井云

大古城門在城南七十里

增考

陽原故城一統志在天鎮縣南漢置縣屬代郡後漢省水

經注濕水又東逕陽原縣故城南北俗謂之北邢州城

一統志又入直隸宣化府古蹟今考其地應在
邑南川諸村及今西寧縣治西南桑乾河之北

延陵故城一統志在天鎮縣北邊牆外本趙邑史記趙世

家孝成王十八年延陵鈞率師從相國信平君助魏攻
燕漢置延陵縣屬代郡後漢廢水經注延鄉水東逕延
陵縣故城北地理風俗記當城西北有延陵鄉故縣也
今考其地應在新平

且如故城一統志在天鎮縣北邊牆外漢置縣屬代郡後
漢省水經注於延水東南流逕且如縣故城南應劭曰
當城西北四十里有且如城

陽門廢縣一統志在天鎮縣東金史地理志宏州陽門鎮
貞祐二年升爲縣元省
今考其地應在直隸懷安縣北
宣化府西一百二十里

長城一統志在天鎮縣北三十里巨大同陽高二縣北東
接直隸宣化府界西接朔平府界史記趙世家肅侯十
七年築長城從雲中以北至代魏書太宗紀泰常八年
築長城於長州之南起自赤城西至五原延袤二千餘
里

長川城一統志在天鎮縣北邊牆外魏書本紀始祖率所
部北居長川太祖天興二年命諸將大襲高車常山王
遵從東道出長川天賜三年駕自漠北南還長川世祖
始光三年築馬射臺於長川神麇元年行幸長川水經

注於延水出柔元鎮西長川城南胡三省曰長川在禦
夷鎮西北大漠之東

今考其地應在豐鎮境暨正黃旗
察哈爾之間

柔元故鎮一統志在天鎮縣東北邊牆外魏書孝文紀太

和十八年幸柔元鎮胡三省曰柔元鎮在漢且如縣西

北塞外其西卽撫冥鎮

今考其地應在豐鎮境暨正黃
旗察哈爾之間

天成軍一統志天成軍今天鎮縣治元和志雲州東至天

成軍六十里唐書地理志蔚州東北有橫野軍乾元元

年徙天成軍合之廢橫野軍又沙陀傳景福初赫連鐸

衆八萬攻天城軍李克用引軍夜入雲州死戰走之遼

史地理志大同府領天成縣本極塞之地魏追武置廣
牧縣遼析雲中置天成縣金曰天城縣元廢明洪武中
置天城衛兼置鎮鹵衛及天成驛分邊長六里其永谷
口寺兒墩等處爲極衝邊外麻池溝等處卽首領駐牧
衛當東路最衝與陽和衛北去六十里中開有白羊口
堡鶻鴿峪堡爲往來要地本朝順治七年廢鎮入
之因改曰天鎮衛雍正三年升爲縣

三會城水經注託台東逕三會城南今當在姜前屯河
之地

託台亭水經注託台水又東逕託台亭北今應在馬家溝
羅亭水經注延鄉水又東逕羅亭今應在平遠堡

馬城縣故城水經注于延水又東南逕馬城縣故城卽今
正黃旗察哈爾兆哈河之南

零丁縣故城今在直隸萬全縣界